

VOILA

45

s Cliqueheft vo de Basler Rolli

**Fasnacht, Bummel, Skiweekend
Buschi bi de Rolli**



musik oesch basel

DAS FACHGESCHÄFT FÜR BLASINSTRUMENTE

Spalenvorstadt 27 • 4051 Basel • 061 261 82 03

Inhaltsverzeichnis:

Prolog	3
Terminkaländer	4
Rolli Tescht 2012-2	4
Buschi bi de Rolli	5
Hochzyt Cyrill & Silke	6
Fasnacht Stamm	8
Vom Bloosmerli und andere	
PLATZTE Budget ...	10
Rolli Skiweekend 24./25.März 2012	14
Rolli Quiz	15
E paar Jungi Rolli am Gryffemähli	16
Allschwiler Fasnacht	17
Unseri erschti Fasnacht bi de	
Basler Rolli JG	19
Fasnachts-Bummel JG 2012	22
Neys bi de Alte	23
Erschti gmeinsami Marschiebig	23
Latärne Vernissage 2012 bi dr AG	25
Fasnahtsmäntig	25
Dr Zyschtig!	27
Mini erschdi Fasnacht bi de Alte	28
Fasnachtsbummel vo dr Alte Garde	29
Uffleesig Rolli Tescht 2012-2	31
Uffleesig Rolli Quiz	31
Ussflugs-Tipp	32

Inseratetarif:

1 Syte	1 Uusgoob	90.- Frangge
1 Syte	4 Uusgoobe	270.- Frangge
1/2 Syte	1 Uusgoob	50.- Frangge
1/2 Syte	4 Uusgoobe	150.- Frangge
1/4 Syte	1 Uusgoob	30.- Frangge
1/4 Syte	4 Uusgoobe	90.- Frangge

Titelbild:

Alti Garde Fasnacht 2012

P r o l o g

VOILÀ 45
Juni 2012

Liebi Rolli

E Traumfasnacht liggt hinter
uns! Kleidet nachem
Ziibeleprinzip und mit dr
Sunnebrülle im Handdäschli/
Hosesagg simmer schtrahlend
durch d Gasse zooge und hänn
unseri musikalische Syte zum
Beschte gä.

No vor dr Fasnacht hänn sich e
Hampfle usgläseni Jungi mega
gfreut, bim Gryffemähli 2012
drbi z'si dörfe. Au s Thema
Marschiebig löst bi mängem
Rolli Gänsehut us - aber eher
wäge de yysige Temperature.

Dorum freue mr uns jetzt
umso mehr über das frieh-
summerlige Wätter und dass mr
uns wieder regelmässig sehn in
de Unterrichtsstunde.

S Voilà-Team

Inhalt Stamm &
Dätschmaischtere:
Nadine Nickler

Inhalt Alti Garde:
Thomas Wyss

Inhalt Jungi Garde:
Nicole Weber
Andrea Roth

Layout & Gschtaltig:
Cyrill Argast

Versand:
Regula Michel

Mitässer & kreative Mitdängger:
Marcus Hablützel

Redaggtionsschluss Voilà 46:

12. Oktober 2012



Adrässänderige:

Bea Klauser
beatrice.klauser@vtxmail.ch

Basler Rolli Terminkaländer

Wenn	Was	Wo	Zyt	Wär
DO 21.06.12	Generalversammlig		20:00	Stamm
12.07.12 -				
21.07.12	Basel Tattoo Beiz	Kasernenareal		Stamm, JG, AG
DO 16.08.12	Grillplausch	Clubhütte FC Polizei St.Jakob		Stamm, JG, AG
SA 17.11.12	Bunte Oobe / Hüttezauer Wettsteinsaal			Stamm, JG, AG
DO 20.12.12	Rolli Wiehnacht			Stamm

2013

02.02.13-	Drummeli			Stamm
08.02.13				
18.02.13 -				
20.02.13	Fasnacht			
SO 03.03.13	Bummel			Stamm
SO 10.03.13	Bummel			JG, AG
SA 16.03.13-	Skiweekend			
SO 17.03.13				

Letschi aggtualisierti Infos unter: www.baslerrolli.ch

Die aktuelle Termin vo dr Alte Garde wärde über s Internet mitteilt!



Rolli Tescht 2012-2

Was heisse die spanische Wörter do uf Dütsch?

el galés
la cornamusa
el festival
la vieja
sesenta nueve
el payaso
Joan Vapor

los Británicos
el bufón
el lancero
la ruta
el tocador / la tocadora de flauta
el tambur / la tambura

Buschi bi de Rolli



Liebi Rolli

Mir möchte uns bi Euch vo ganzem Härze bedangge für die mega tolli Ateilnahm wo mir vo euch becho händ, für die liebe und unterstützende Wort eifach für ALLES.

Schön, dass es Euch git.

Dr Nils Maximilian isch am 20. Oktober 2011 mit ganze 1400 Gramm und 41cm uff d'Wält cho. Jetzt isch dr Nils e halb Joor alt und isch stolzi 7800 Gramm und 65cm lang.

Conny & Mike & Nils



*Wir sind übergücklich
und freuen uns über die
Geburt unserer Tochter*

Anna Lena

*Sie hat am 9. Mai 2012 um 01:47 Uhr das Licht der Welt erblickt,
wog 3520g und ist 50cm gross.*

Cyrill & Silke



Liebi Rolli,

An däre Stell möchte mir uns
ganz härzlig für Euer Ständeli
an unserem Hochzytsfescht in
Rhyyfälde bedangge.

Au dangg Eurem Ufftritt isch
dä Daag für uns unvergässlig
gsi.

Eure Cyrill & Silke



Jos. Kym AG, Maler Gipser



*mir mole, gipse
und tapeziere*

vielseitig · fair · zuverlässig

Reinach · Laufen

Telefon 061 711 34 58 · www.kymmaler.ch

Fasnacht Stamm 2012

Wie allewyl traffe mr uns uf em Münschterplatz und beschtuune die verschidene Lampe vo unsere Cique-Künschtler. Mer pumpe bis zem blatze. Voilà. Und scho goht s los quer durch d Grossbasler Innestadt zämme mit de Pfyffer vo dr Alte und Junge Garde. Bi schönem Wätter, zwar no chli küehl, gniesse mr die schöne pfyfferische Kläng und stimme uns uf d Fasnacht yy.

Nach wenige Stunde Schloof – wenn überhaupt – schtöhn die gsamte Rolli scho wieder vor em Musik Hug, tarnt in unsere jewilige Lieblingsgostüm. „Morgestraich – vorwärts – marsch“ schreit dr Haabi vo hinde us sinere Larve. Dr Startschuss isch gfaller! Langsam gwaggle mr in Richtig Kaffi Spilmaa, wo mr uns vo dr AG und JG abnaable. Bereits nach e paar Rundene kömme mr in Gnuss vomene herrliche Sunneuffgang (lueg d Föteli a uf unserer Homepage als Bewyys).



Und mit dere Sunne ischs grad 3 Daag witergange. Am Nomidaag marschiere mr schön im Zugskostüm via Banggverein in dere Sauhitz über d Wettstaibrugg. Unsere Zug wirkt mit dene Ballöön extrem schön! Guet gmacht, ihr Sujekommissiönler!

S Znacht hämmer dörfe im ehemolige L'Escalè zue uns nä wo tiptop usgseh hett und s Ässe au sehr guet gsi isch. Vylle Dangg für d Organisation, Edgar, mr schätzes sehr!

Und ab uf d Gass. D Claraschtroos durab gämmer unser Beschts mit de schnälle Märsch und gniesse d Ufmerksamkeit, wo mr bi de Zueschauer gweggt hänn ;o) No e paar Ründeli im Glaibasel ... und e paar Ründeli im Grossbasel ... und scho isch dr Mäntig vrbi.

Dr Zischtig hett sich wieder individuell gschtaltet und me hett immer wieder e Rolli durelaufe oder inere Beiz hogge gseh. E Teil mehr und e Teil weniger ;o) S Schooffegg isch immer wieder e längere Uffenthalt wärt.



Am Mittwoch hett uns dr Sunneschyy n ei Daag mehr vrwöhnt und mr hänn kuum könne gnuegg vom Gässle beko nacheme schöne Cortège. Im Aaschluss ans Nachtässe simmer wiederum mit de Alte und Junge Rolli vom Rähbus zum Latini marschiert, zum dr legändäri Gotti/Göttihalt z'zelebrierte. Denn hänn scho die letschte paar Schtunde im Bermuda Dreieck aagfan-ge, wo mr eifach nur no gnosse hän. Und disjohr hämmer alles chli länger gnosse und uns kurz nach de Viere vo dr Fasnacht 2012 vrabschiidet.

Nadine



Vom Bloosmerli und andere PLATZTE Budget...



Kurz vor em Zähni bim Rialto aako, ghörsch scho dr Spruch „Hoppla, s isch meini e Trämli aako!“ Jäwoll liebi Lüt, dr 10er, isch fascht us allne Nööt PLATZT! Ettige, Bottmige, Binnige... Immer stiige Rollis y! Und dr Hammer isch: Nöggscht Joor isch denn scho eini din, wenn mir yystiige... GÄLL, EVIIII! Bevor jetzt aber dr Rolli- Leimetal- Express PLATZT, wände mir uns wyter em Bummel zue... Im Rialto het uns e kulinarisch vyylfältige Apéro erwartet... Jä hallo, nei! Zerscht het me no dur d Stylingkontrolle vo de beide Tüürsteher miesse.

Guete hän die beide so dunggli Brülle aa ka, denn hän sie nit alli Mängel gseh! Wobi ich muess sage, es hän sich eigentlich alli in Schale gworfe! Chappo! Bis do isch dr Bummel für niemerts PLATZT.

Aschliessend sin zwei adretti Dame mit Cüpli uf em Sofa ghögget und hän d Bummelfinanzierig gsicheret. Nit, dass no e Höhepunkt PLATZT!

Bi ihne het me au no d Ufgoob ka, sich uf me T- Shirt mit Unterschrift z'verewige (zu dem Shirt gits spöter wyteri Gschichte...). Ei Unterschrift het natürlig erscht nochträglich ihre PLATZ gefunde.


Jetzt isch me bim kulinarisch vyylfältige Apéro glandet. S het so vyyl zÄsse gha, dass me bim Luege scho fascht PLATZT isch!

E bitzeli spöoter sin mir denn bätte worde, im Saal näbedra PLATZ znäh und d Rolli-Bummel-Gschäftsleitig het uns am Flip Chart erklärt, was mir zdue hän, dass dä Bummel sicher nit PLATZT.

E Punggt uf dr Traktandelische isch d Gant gsi. Schiinbar hän d Yynahme nooni für dr ganz Daag glängt, dorum sind e paar Exklusivität zue Versteigerig ko. Jetzt komme mir wieder zu dem T-Shirt vo vorhär. Bi fünf Stutz het d Bieteri aagfange. Nachdäm d Annina em Eggi versicheret het, dass sie no kei neus Rolli-Piji bruucht, het sich dr Häberli in Unköschte gstürzt (S Bummel-Budget isch grad PLATZT gsi...). Wyter isch no e grahmte Stügg vo dr Latärnelyynwand unter dr Hammer ko und d Tamboure hän e Sammlig gmacht, zum sich am Herr Instruggter für d Minus-Grad-Douple-Marschiebig räche zkönnen.

Im Aaschluss an die Gant het d Rolli-Bummel-Gschäftsleitig no e paar sehr yysatzfreudigi Vereinsmitglieder verdankt und hän somit eigentlich die traditionelli Bummel-Reed vom Presi PLATZE lo.

Damit dr wyteri Bummelverlauf nit PLATZT, sin mir in drei Gruppe ufteilt worde. Zwei Gruppe hän e Ufgoob zuteilt beko, die dritti isch liicht irritiert und unterforderet wieder zum Apéro dagget und het sich Mueh gäh, vor luter nüt due, nit z PLATZE. Am fünf vor zwölfi isch vor em Rialto dr rooti Teppig usgrollt worde und dr Patrick het sini Stroof abgearbeitet: Duple drumme, bis dr hinterscht und letschti Rolli in



eim vo dene 14 Taxi hoggt! PLATZT isch är derbi nit... aber ins Schwitze ko!
Jä und denn sin mir in 14 Taxi vom Rialto über d Heuwoog, dr Barfi, dur d Freie
Stroos zum Restaurant Schlüssel kutschiert worde! Dekadänt? Jä! Aber e saugueti
Idee!!!

Im Schlüssel hän zwei Celliste ihres Beschte gäh, uns musikalisch klassisch z unter-
halte. Em Carl si Wunsch vo „Nocking on heavens door“ isch leider PLATZT...aber das
isch glaub nit wyter tragisch.

D Croqettli sin nit grat PLATZT vor Füechtigkeit, aber s Gmies und s Fleisch sin fein
gsi und au d Vegetarier sin glaub zfriede gsi. In dr Helfti vom Rahmtäfel-Dessert han
ich miesse ufgäh...sunscht wär i wirklig PLATZT!

Irgendwo derzwüsche isch verkündet worde, dass s Bummel-OK e Brief us Grieche-
land beko heig. Für dr Ronny...vo dr Olivia... Unseri cliqueinterni „Meerlidante“ het
denn dä Brief wunderbar vorgläse und dr Ronny isch vor Stolz fascht PLATZT. Sini
Olivia... sini heissgeliebti Holzdrumme... schriibt ihm e Brief! Und nit eifach nur so
en Brief...nei, e richtige Liebesbrief!!! Numme dr Tambour hinde dra sig no es Spüürli
besser gsi... Ach jaaaa, die beide Turteltübli könne die nögscht Fasnacht scho
fascht nümmi erwarte und PLATZE schier vor Ungeduld!

Denn isch es denn langsam Zyt worde fürs Bloosmerli und die beide Gruppearbete,
wo im Rialto no vorbereitet worde sind.

Zerscht hän mir e kleine Ydrugg derfo beko, wie ächt unsere gwittrige Drummeli-
Uftritt hät könne verlaufe. Em Schmidli isch derbi vor luter Räägedropfe fascht d
Bloose PLATZT!

Derno isch dr Schlüsselsaal vo enere Guggle heimsuecht worde! D Rolli-Schränzer



sin in Guggemanier, nit grad knühschoonend, yymar-
schiert. D Majorin Ursi (me sott nie go rauche, wenn
nooni alli Ämtli vergäh sin!), het ihri Schränzer voll im
Griff gha. Mit Drummle, Pauke, Zinelle und Cazoos isch
uns e zackige San Carlo zum Beschte gäh worde. Mir sin
vor Lache fascht d Tränedriese PLATZT!
Vor luter Lache het denn die wyssi Gruppe grad ihre
Ysatz verPLATZT...

„Oh läck Du mir,

oh läck Du mir am Tschoope,

oh rutsch Du mir dr Buggel ab und bloos Du mir in d Schueh!“

Bim Rolli- Bummel- Bangg hän denn irgendwie grad alli e bitzi PLATZT. Marcus, das
isch aber au e ganz schwiirige Refrain gsi! Dä hät au scho uf d Traktandelische am
Morge ghört!

„Rolli, Super-Rolli,

Vo dr Sohle bis zer Glatze,

Dien mir drummle und pfyffe bis d Blootere PLATZE.“

Also, denn mache mir doch das jetzt au und göhn ab uf d Gass, die letschte paar
Stunde dusse go gniesse!

S isch herrlig gsi!!! Nit zkalt, nit zwarm...eifach super!

Die erschi Reihe Tamboure isch offesichtlich nervös gsi, es könnt e Fäll PLATZE, re-
spektiv unter de Stägge-Wurf-Künscht vom Marcus e weneli lydde. Uf jede Fall sin sie
in emene gebürige Abstand zum Tambourmajor gloffe. Aber dr Marcus het numme
eimoll fascht PLATZT. Vor em Schnabel het är verdächtig tief in d Kneu miesse...
Bim letschte Umgang sin schiinbar d Närke vo e paarne zum PLATZE aagspannt gsi.
Immer wieder isch öbber zum Zugschef führe ghöselet. Aber däm isch Gott sei Dank
dr Krage nit PLATZT und är het uns pünktlig kurz vor de Zähne vor em Schnabel
ymarschiere lo, wo mir denn dr Basler Marsch mit eso vyl Elan gruesst und pfyffe
hän, dass mir grad dr Fasnachtsändstraich no kompensiert hän!

PENG!!! ...jetzt isch s PLATZT!

Melanie & Carl





Rapp | Trans



Verkehrs- und Mobilitätsplanung, Verkehrsmodelle,
ÖV-Beratung, Verkehrstelematik, Ökonomie,
Güterverkehr und Logistik.

Rapp Trans AG – ein Unternehmen der Rapp Gruppe

Rapp Trans AG
Güterstrasse 137
Postfach
4018 Basel
www.rapp.ch

Rolli Ski-Weekend vom 24. und 25. März 2012

Wie jedes Joor traffe mir uns z Münsige uf dr Raststätt zum erschte Kaffi bevors wyter goht in d Länk.

Bi strahlendblauem Himmel und Frieligstemperature sin mir in dr Länk ako. D Simone het eigentlich ihri Skischueh grad welle gege d Wanderschueh tusche. Hejo es het glaub no 1 oder 2 Bärge dört wo si noni beklumme het. Nachdäm d Rolli Skifahrer sich uf d Pischte gwogt hän, sin d Fuessgänger e weneli go laufe. Es isch au z Fuess schön in dr Länk. Dr erscht Apéro het au nit lang uf sich lo warte. E Samschtig in de Bärge und an dr Sunne sitze das isch Läbe pur. Zobe hets wie jedes Joor e feyns Fondue gä und literwys Tee oder so ähnlichs..... Damit mir das Fondue nit grad uf de Hüfte hän, isch notürlich im Iglu bis frieh in Morge ine s Tanzbei gschwunge worde. E ganz grosses Lob unserem DJ (dä vo hinde in dr Mitti), är het uns mit super Musik verwöhnt. Nachere kurze Nacht het uns am Morge d Sunne gweggt. E feyns z Morge und ab uf d Ski für die einte und die andere häns gmietlig agange. Es wär jo scho wieder Apéro-Zyt gsi. Alles in allem hän mir eimol meh e super Rolli Wucheänd gha.

E reduzierti Skifahrere ☺



ROLLI - QUIZ

Was ist kein Tier?

Shetlandpony

B

Hängebauchschwein

F

Drahtesel

E

Siamkatze

P

Wie finden Fledermäuse nachts ihre Beute?

mit Echo-Ortung

E

mit ihrem Geruchssinn

L

gar nicht, sie jagen tagsüber

O

mit ihren scharfen Augen

I

Eine Nacktschnecke ist eine Schnecke ohne ...?

Pullover

R

Nest

S

Haus

H

Hörner

T

Welche kleine Springmaus gibt es seit 1990?

Speedy Gonzales

I

Diddl

G

Dödl

S

Dingel

A

Was ist auch ein Insekt?

Blinker

E

Reifen

T

Lampe

K

Bremse

L

Aus den richtigen Lösungsbuchstaben kannst Du nun ein Lösungswort zusammenpuzzeln:

Lösungsbuchstaben:



Lösungswort:



E paar Jungi Rolli am Gryffemähli

S Thema vom letschte Vogel Gryff isch „d Jugend“ gsi und us däm Grund sin 6 Kleibasler Clique zum Gryffemähli yglade worde. Und zwar d Naarebaschi, d VKB, d Rätz, d Olympia, d AGB und natürlig d Basler Rolli. Jedi Clique het dörfe 6 Pfyffer und 3 Tamboure bringe. Bi de Rolli het me sich entschiede, dass die, wo am meischte in d Yebigsstunde ko sin, hän dörfe mitgoh. Und zwar: d Lara B., d Lara P., d Annik, d Sina, d Lisa und d Fiona. Und vo de Tamboure sin's dr Fabio, dr Darius und dr Robin gsi. Vorgspielt hän mr dr Arabi und dr Wettsteimarsch. Alli hän miesse flissig yebe. Zweimol hän mir e Yebig gha mit dr 3E Clique – eimol im Waisehuus und eimol uff dr Bühni im San Francisco Saal im Kongrässzentrum. Und denn isch es sowyt gsi: Unse-
re Ufftritt am Gryffemähli. Zerscht hän alli Junge dr Arabi pfyffe und drummlet. Denn isch d 3E Clique uff d Bühni ko und gmeinsam hän mir denn no dr Wettsteimarsch gspielt. Nach em Ufftritt sin alli im Saal ufgstande und hän gjublet. Sogar dr Ehregascht Benni Huggel, wo in dr erschte Reihe gsässe isch. Nach em Ufftritt hän mir no e kleini Verpflegig bekoo und zum Abschied het jede no e Tafele Schoggi griegt. Mir hän's e tolle Ufftritt gfunde!

Fiona und Lisa



Ab **U**ff
d'Gass!

crome.ch

Immer unterwegs für Sie.
www.undernaehrer-ag.ch

Unter Nährer
Unser Elektroprofi

Allschwiler Fasnacht

Am Sunntig, 19. Februar hämmer uns zur letschte Marschprob troffe, uff dr Yladig isch gstande mit Goschdym! Eigentlich e chli ungewöhnlich und denn no erscht dr Träffpunkt: Tramschlaufe in Allschwil!

Erscht wo mer langsam nöcher ko si, hämmer gmerkt, dass das jo meh mit Fasnacht z tue hett, als nur e eifachi Marschprob, mir sinn am Umzug vo dr Allschwiler Fasnacht mitgloffte. S'Wätter isch guet gsi, dank dr Verstärkig uss em Stamm, hett's au nid schlächt tönt, aber hart isch es ab und zue gsi, s'hett richtigi Staus gäh wie am ächte Cortège. Derfür sinn mer denn au mit eme z'Vieri belohnt worde.

Sunscht isch es e kurze, nid sehr ereignisrreiche „Ufftritt“ gsi, mir hänn niemer verlore, s'isch kei Drummle oder Piccolo kaputtgange. S'isch au niemmer in de Spreuhüffe blibe stecke.

Derfür hänn mer nach dr Fasnacht - bi dr Vorbereitig vo däm Artikel - no viel glernt. Villicht hilft uns das im nächste Johr für d'Vorfreud uff d'Allschwiler Fasnacht, will s'isch jo eigentlich sehr toll gsi. Wüssed ihr also:

- Dass d'Allschwiler Fasnacht am Sunntig am Morge am 5i mit em Morgestraich afoht?
- Dass me ärschthhaft überlegt in Zuekunft scho am 4i azfoh, damit me de Drämmli und em Sunntigszytig-Lieferant nid in Wäg kunnt?
- Dass Dr Umzug e Umzug und kei Cortège isch? Wär scho mittgloffte isch, kennt jetzt dr Unterschied, mir hänn dasmol d'Nummere 26 gha (vo 83)
- Nach em Umzug s no ne Guggkonzärt gitt?
- Am Mäntig e Kinderumzug und e Kinderdisco stattfindet? (unsere Bappe hett zwar Kinderdisse anstatt Kinderdisco gläse und sich e chli gwunderet ...)
- Am Mäntig und Zyschtig Obe sinn d'Schnitzelbänk unterwägs und
- Am Mitwuch am zwei am Nomidaag isch denn d'Fasnachtsbeerdigung
- S gitt au e Sujet und e Blaggedde, das Johr isch's Sujet gsi „D'Schämpisduschi am Euro-Airport“ (das, will e Airbus uff e Name „Allschwil“ tauft worde isch – hoffentlig reklamiere d'Allschwiler jetz nümme so über e Fluglärm)

Uff dr Homepage www.allschwiler-fasnacht.ch hetts übrigens näbe Föteli au e Jurybricht! Will's dr 2012er Bricht nonig gitt (erscht öbbe im Juni) und mir im 2011 nid gsi sinn, e Usschnitt uss em 2010-er Bricht „So auch verschiedene junge und ältere Garden aus der näheren Umgebung; sie sind immer wieder gern gesehene und willkommene Gäste. So durften wir in diesem Jahr den Nachwuchs der Alti Stainlemer, Schnuurebegge, Basler Rolli, die Aagfrässene, Sans Gène, JB Santihans und Rhygwäggi begrüßen.“ Logischerwys wärde die Yheimische Allschwiler ussfüerlicher erwähnt. Mir sinn gspannt, was im Bricht vo däm Johr stoht.





Unseri erschti Fasnacht bi de Basler Rolli JG

Mir - d'Lena und dr Luzian Jung - hän d'Fasnacht toll gfunde. Vor allem dr Mor-gestraich, will's dunkel gsi isch. Und will mir Geburtstag kha hän.


S'Morgenässe in dr Manor isch guet gsi, mir hä e Muffin kriegt, mit ere Kerze druff und alli hän Happy Birthday gsunge. Aber all die Stägetritt ufe laufe isch e bitz asträngend gsi. Es hätti scho e Lift kha, aber do hän nit 40 Lütt drin blatz gha.

D'Damboure hän denn dr Lift gno, wäge de Drummle.

Am Nomidaag sin mir in dr Steinevorstadt gstartet. S'Marschiere am Cortège und s'Zeedel verteile het Spass gmacht. Es isch wunderschöns Wätter gsi und es het vili Lüt am Stroosserand gha. Immer 2 Kinder hän miesse s'Requisit zieh. Mir Vorträbler hän uns abgwächslet. Am Wettsteiplatz hän mir e Pause gmacht und uff dr Wiese Fangis spielt. Und denn het's no Kueche vom Grosi ghä und Ystee.

S'Nachtässe im Escale (ggg) isch guet gsi. Dr Stamm isst jo im gliche Restaurant, so hän mir dr Papi troffe. Eigentlich hän mir uns scho am Wettsteiplatz troffe. Dr Rundgang mit em Stamm isch sehr cool gsi. BRSC. Unser Jungs Spiel het klei gwirkt in däre grosse Gruppe vom Stamm. Noch em Ässe sind mir wieder elei loos.

GN8!



Ihr
ElektroTeam
für jeden Fall!

© CTB AG

MORITZ HUNZIKER AG

MORITZ HUNZIKER AG
Elektro - Telefon - TV - EDV
CH - 4019 Basel
Kleinhüningerstrasse 183

Tel. +41 61 631 35 35
Fax +41 61 631 36 66
info@elektro-hunziker.ch
www.elektro-hunziker.ch

Dr Zyschtignoomidag hän mir au mit de Junge Rolli verbrocht. Mir hän Ballön bekoh, wo mir am Arm oder an d'Täsche bunde hän. Ab und zue isch trozt däm eine ab. Oder eine het sich mit irgendöppisem verhängt. Z'obe sin mir no mit Mami und Papi go z Nacht ässe und denn fasnachtsmied ins Bett gfall.

Au am Mittwuch isch herrlig Wätter gsi. Bim z' Nacht hän mir dörfe e Lössli zieh und dört druff isch dr Name vom Götti oder Gotti gstande. Dr Gotti/Götti-Halt in dr Falknerstroos isch ideal gsi, will's dört e Mc Donalds in dr Nöchi het.

Am zwölfi z'Nacht sin mir um dr Gämsbärg-Brunne ummegstande und hän dr Usspyff macht. Dört het uns s'Gotti Helena abholt und uns hei ins Bett brocht. Mami und Papi hän jo no bis zum Ändstreich am Vieri wittergmacht.

FIGUGEGL

LG, Lena & Luzian





Fasnachts-Bummel Junge Garde 2012

Am 18. März 2012 ging es mit der Jungen Garde der Basler Rolli auf den Fasnachts-bummel.

Bei frischen Temperaturen und grauem Himmel trafen wir uns alle am Wettsteinplatz im Cliquenkeller. Dort gab es erst einmal etwas für den Durst und den ersten Hunger.

Wir durften uns in Gruppen aufteilen und bekamen dann die Aufgabe Schnitzelbänge zu schreiben, rund um das was an der Fasnacht gelaufen ist. Diese wurden nach dem Mittagessen zelebriert.

Als wir die erste Aufgabe gemeistert hatten, ging es zu Fuss und bei Regen über die Wettsteinbrücke Richtung Theater, genauer gesagt zum Tinguely-Brunnen (auch Fasnachtsbrunnen genannt).

Dort erwarteten uns 3 Stadtführer, die uns zu einer sehr interessanten Stadtführung mitnahmen. Beim Tinguely-Brunnen fing es an, dann gingen wir in die Barfüsserkirche. Da konnten wir anhand eines Modells schauen wie unsere Stadt früher ausgesehen hat. Anschliessend gingen wir Richtung Münsterplatz in den Rollerhof ins Fasnachtsmuseum. Dort erfuhren wir sehr interessante und spannende Dinge über die Basler Fasnacht. Von dort aus gingen wir wieder in den Regen hinaus Richtung Rest. Schnabel. Bei Salat, Nudeln, Gemüse und Geschnetzeltem stillten wir unseren Hunger. Als wir das Dessert verspeist hatten, kam der grosse Moment der Schnitzelbänge. Jede einzelne Gruppe hatte ihren grossen Auftritt.

Gut gestärkt begaben wir uns dann auf die Strassen (Gässle). Anfangs ohne Tambouren, marschierten wir pfeifend und singend Richtung Rittergasse. Vor dem ersten Halt wagte sich ein einziger mutiger Tambour aufs Parkett. Die restlichen Tambouren konnten ihre Instrumente in der St.Alban-Vorstadt abholen. Komplett und voll ausgerüstet, ging es nun durch die Strassen von Basel. Wir trafen uns noch mit der Alten Garde vor dem Stadtkeller. Wir hatten das Vergnügen eine satte Runde mit der Alten Garde vom Stadtkeller über den Rümelinsplatz zum Stadtcasino zu erleben. Nach einem längeren Halt am Barfüsserplatz ging es dann in die Freie-Strasse und in die Gassen der Stadt bis um 22:00 Uhr. Es war ein guter Fasnachtsbummel 2012. Ich freue mich schon jetzt auf die Fasnacht 2013, denn es ist der Hammer ein Basler Rolli zu sein.

Sarah Rudin

NEYS BI DE ALTE

Geschätzte Leserin, lieber Leser

Wie oft brauchen wir doch das geflügelte Wort von ‚Heiss und Kalt‘. Es ist wörtlich zu nehmen, wenn man sich an das unglaubliche Wettercrescendo erinnert, welches uns Petrus rund um die Fasnacht beschert hat – inklusive einem weinenden Himmel zum Abschluss am Bummel. Doch lassen wir die Fasnacht 2012 doch nochmals in kurzen Berichten Revue passieren. Es lohnt sich auf jeden Fall.

ERSCHTI GMEINSAMI MARSCHIEBIG: TRÄFFPUNGGT RIECHE DORF, MINUS 15 GRAD.

Dr Landgaschthof isch gschlosse also gits e sogenannte Kaltstart richtig Weil.

Ysigi Kälti s`Huurniigle isch vorprogrammiert.

D`Motivation isch brutal gsungge.

Mir starte mit em Monty, unserem neu glehrte Marsch, und höre duesch numme d`Tamboure.

Aber nit wäge de kalte Finger. Obersch... Dr Ysatz verpasst, z`wenig guet uswändig gleehrt, Hueschtereiz im Hals.

Das lauft jo super. Nomool vo vorne. E zaghafte Pfyfferysatz. Mr würge dä Marsch dure.

Bim zweite Mool gohts scho e weeneli besser.

Mit de altbekannte Märsch gohts dur e verschneiti Lange Erle.

Hät i nur e bitz meh giebt, denn wärs richig zum Gniesse.

Eigentlich isch es wunderschön. Dr Vollmond schynt in die wyssi Landschaft, es isch kalt, und dr Schnee knirscht unter unserne Fiess.

Nonem Brüggli e kurzi Pause.

Denn wyter, nomool dr Monty, ka mi ächt fasse.

Denn im Laubfrosch s`erschte Bier nit grad zum uffwärme, aber herrlig.

D`Brotwirscht und Härdepfel basse wie s`Düppfli uffs i.


Wie immer hämmers gmieltig und luschtig zämme. Ich fühl mi wohl wie innere Familie.

Das isch es doch worum i au binnere Saukälti, im gröschte Schiff oder bi Glattys und Yszäpfli am Piccolo nit wott fähle. Ich hoff es goht euch au eso.

Anita



Ihr **Wein-** und **Getränke-** **Lieferant**



Theo Rietschi AG
Getränke en gros



Hahn-Rickli AG
Weinkeller

LATÄRNE VERNISSAGE 2012 BI DR ALTE GARDE

Langsam ab de Siebene druudle
die erschte Gescht gmietlich im
Spalekäller y. Mit em erschte
Getränk in dr Hand lääse mr
scho die erschte Latärnlivärs, wo
uff dr lüchtende Latärne vertailt
sinn. Do dr bi möcht i grad mol
allne Dangge sage wo für uns,
passivi Aktivi das jedes Johr
ermögliche und d Lampe dert
unde nonemol zämmebaue.
Grosse Circus. Merci!

Dr Christian begriesst is zer
Vernissage mit eme Sprüchli
uss sym iPhone, und unsere

Tambour Mayor (ebbe no iPhone los, kas halt usswändig...) stellt uns nonemol
unsere neye Latärne Künschtler vor. Dr Rene Lange liest is dr Zeedel, dangge vielmol
eso muess me nen nit no deheim im stille Örtli lääse. Dr Kameramaa für dr Rolli Film
wird is no vorgschellt, upps, laider hanni sie Name vergässe. Är isch also inkognito
do, me gschpiert und seht en au nit. Apropos Fasnacht, au dert isch är niene in d
Queri ko.

D Latärne isch e Pracht, dr Circus Dootedanz ka ko. Mir sinn alli mächtig stolz und
freie is wie glaini Kinder uff die bevorstehende drei Daag.

S Ässe isch sehr gut und s schmeggt nach meh.... D Täller sinn ussgschläggt, s 3
beinige schwarzi Säuli macht d Rundi, ainigi sitze gmietlich an dr Bar oder im Rau-
cherstübli und bewache s Dessert, gäll Christian, alles unter Kontrolle. S Dessert
Büffet goht uff, dr Kaffi wird bschtellt. Gmietlich wird no fachgsimplet über dr Räscht
vo dr Wält. Ab de Elfi göhn die Ainte brav ins Bett und die andere höggle no bis in
die friehe Morgestunde.

E Alti Garde Rolli Gniesere

FASNACHTSMÄNTIG

Nach eme wunderschöne Morgestraich het's nach eme wunderschöne räschtlige
Mäntig ussgseh. Am Nomittag am viertel ab zwei uf em Wettstaipplatz und über
d'Brugg isch me vor luter Lüt fascht nüm duurekoo. Aber s'het zytlich doch no
glängt. Zwüsche de Honig-Biinli in dr Rittergass duure und über e fascht leere Mün-
scherplatz, dr Schlüsselbärg durab in d'Freie Strooss, und dört isch denn au scho
unseri Ladäärne bi dr Hauptboscht gstande.



Mr sin yygstande und hän emol stehend dr "Monty" gmacht. Und lueg au do - dr Rolf kunnt au no... Während em aaschliessende "Unggle Sam" het sich unsere Vordraab Richtig Freie Strooss könne duuresetze und mr hän ys uf diräggtem Wääg in Richtig Utegass in Beweegig gsetzt.

Dört hämer unsere verdiente erschte Halt gmacht. Wie immer het me nur schnäll wölle wüsse, wenn's wyter goht, und denn ab - Richtig Baiz... Will s'Wätter so schön gsi isch, simer vor em "Ysebähnli" uf de Bängg gsässe, leider nit in dr Sunne, aber schön isch es drotzdäm gsi. Und will dä "langi" Marsch Hunger gmacht het, het dr Aint oder Ander näbe Flüssigem halt au öbbis zwüsche d'Zeehn bruucht.

Mr sin wyter über e Clarablatz dur d'Clarastrooss, am zweite Comité verby. Und will

mr e-n-Alti Garde sin, hämer denn vor dr Muschtermäss au scho dr zweit Halt gmacht. Irgendwie hämer d'Zyt bis zem Nachtässe jo miesse umme bringe...

Mr sin in dr Sunne gstande und hän im farbige Dryybe zuegluegt. Und hän ys denn Richtig "Schmale Wurf" uf dr Wääg gmacht. D'Struppi, in ihrem "Tussi"-Goschdüm, isch, wie scho dr ganz Nomidaag, hi und här gfägggt und het ys d'Märsch aazeigt. Irgendwie het sy my die ganz Zyt an e Seggretäärin bi uns im Gschäft erinneret...

Im "Schmale Wurf" hämer - aimol meh - wunderbar guet z'Nacht gässe, und nach ere längere Pause simer wider Richtig "Räbhuus" ufbroche, wo scho dr Stamm uf ys gwartet het. As mr usgrächnet mit eme zimlig abverheite "Monty" dört yygloffte sin, hät jo nit unbedingt miesse sy! Dr Stamm het grosszügig drüber ewäg gluegt und gloost, und denn hämer ys as zämmegwürflete Huffe uf e Wääg ins Grossbasel gmacht. Nach herrligem Gässle und verschiidene Halt isch denn am zwölfi für dä Daag dr Schlusspunggt gsetzt worde.



Schön isch er gsi, dä Fasnachtsmäntig, und wenn y gwüsst hät, as für mii d'Fasnacht zue däm Zytunggt für das Joor scho fascht verby isch, wär y glaub nonig heim. Aber ebbe, wär weiss scho, as er am andere Daag mit ere dropfende Naase, mit eme Hals wo weh macht und gschwullene und ständig dräänende Äugli uffwacht...

Christine

DR ZYSCHTIG!

.... um e Bann im schöne Mai- gönge d'Burger schtolz
lege Zwyg zu jedem Stai, zaichne Euses Holz.....

Summend bin ich vom Glaibasel via Fähri uff e Münschterplatz. Zuefellig hann ich dr erschti Banntägler Fons atrofte und uff die Ains simmer derno in d'Camparibar als "Tschamauche" mit Flieder uff em Huet, ytroffe. Gly emol sin no e baar vo dr Rolli Rotte und au Lieschtlemer derzue ko, au d'Christa mit ihrem "sälbergstylte Rolli Rotte-Fähnli" hett für Uffsehe gsorgt! - si hett derno au grosszügig im Aernscht vo ihre Fähnli gschänggt.....!!!

Am Zwai sinn d'Rotteflehrer Ursi und Annelies mit emene Zügli Pfyffer und Dambuure uff d'Route zem dr Zyschtigsbann ab z'laufe. Diversi Aperööli's sinn uffem Programm gsi und ohni Gegeagriff vo "Ussedörfler" und Kinderzügli sinn mer via Bäumligass uff em Münschterplatz ako und schnäll s'Soll vomene Umdrunk erfüllt. Nochtär sinn mer via Augustinergasse - Martinsgasse - uiui, das isch e Wääg gsi - sehr scheinig! - bim näggschte Halt ako - in dr Galerie vom Staatsarchiv isch e Apéro gsi, offeriert vo Tschamauche Dambuure vom Gänfersee und e Dambuurefanatiker hett mer derno gsait: es sig aigentlig nur fir Drummler! - schmeggsch dr Pfäffer?, aber die Alte Rolli hänn halt Gentlemen-Dambuure wo ihri Pfyffer mitnämme - und eso sinn mer derno gniisslich amene Gleesli Wyss ghangen... denn dr Abschtieg via Martinskirchgässli - Rhysprung - Mittleri Brugg - ins Glaibasel isch nochtär wieder schtrapaziös gsi. Glungeni Halt do und dert, im Glaibasel git's immer ebis zluoge und z'loose bis Zyt gsi isch fir's Nachtässe in dr Rhywiera.

Nochtär hett sich dr Zug vergrösseret und d'Umgang au!!! Ebbe am Elfi (23.00 Uhr) hämmer wieder in s'Grossbasel übergesetzt - Bermuda-Dreiegg - Spalebärg - Harmonie - Gämsbärg - Käller abe - Käller uff - d'Raiefolg weiss ich nimmi so genau..... es isch aifach scheen gsi und gmietlig - aber am 26.00 Uhr!!! - genau nach Marschbefehl.. isch derno s'Abwingge gsi vo unserem Dambuurmajor fir e "Gutzi" Zyschtig 2012 - et voilà!

Esti

MINI ERSCHDI FASNACHT BI DE ALTE VO DE ROLLI



S'Fasnachtsfieber stiggt: Ladärnevernissage im Spaale-Käller, vo wiitem het me's gschmegett, dä feyni Duft vo Lyy und Farb.

Am Suundig packe (an dr Fasnacht dislozier ich vo Münggestai ins Gundeli), alles barat mache, Waggis, Kopfladärnli, Pfyfferbutzerli, was me eso alles brucht an de scheenschte Drey Dääg im Joor. Denne gohts scho glii ab in d'Stadt zem Apéro in dr Martinsgass und zer Ladärnevernissage uf em Münschterplatz, denn haissts Yystooh! I däm grosse Huffe , herrlig! Es gribblet! Jetzt gohts nümme lang bis es vieri schloht! Nach dr kurze Nacht, **am Mändig ab in d'Stadt**. Viel Lüüt hets gha, ich glaub, soviel Lüüt wie noh nie... Ändlig akoo bim Musik Hug und s'gribblet wie wahnsinnig. Ändligg yystoh....

ACHTIG: 2x MORGESTRAICH, DIE ALTE, MORGESTRAICH, VORWÄRTSSSSS
MAAAAAARSCH!!!! Und das juste uf e Vierischlag! Aifach dr HAMMER! Denn gässle, gässle, gässle. No e Schlummer im Gifthüütli und ab haim go pfuuse.
Am Nomidaag ab uf e Cortège und scho gli sin mir go ässe, feyn isch gsi! Dr Stamm wartet scho am Räbhuus, Pfyffer do duure, Dambuure dört duure. Es isch e schöni Rundi gsi. ☺

Als Wandergsell bin ich am zwei in dr Campari-Bar inere kunterbuntgmischde Wandergruppe yygstande und has tolle Wätter gnosse. Dr Petrus isch halt doch e Basler! Mir hän viel pfyffe und gruesst und vor allem hämmers luschtig gha bis in d'Nacht.

Am Mittwoch kumm ich am Kunschdmuseum a und suech z'allererschd unseri Ladärne... Aha, dört stoht sie jo, bin ich doch rächt. Ab uf'd Route, mit dr Sunne im Rugge d'Wettstaibrugg durab. Die ganzi Fasnacht isch so schnäll verbi gange, nämlig Apéro, z'Nacht. Ab über d'Brugg die Junge und dr Stamm warte scho: Ser-Reihe-Yystoh! E grosse Zug! Zwüsche goldige und silbrige Ballön und Halbhirnlose han ich e Plätzli gfunde. Herrlig! Es pfyfft und ruesst quer dur d'Stadt! Noch eme längere Halt ab Richtig Gämsbärg die Junge verabschiede, aabe an Schnabel, jetzt gohts nur no vier Stund und denn isch die Fasnacht Gschicht, my erschdi Rolli-Fasnacht! Also: gässle, gässle, gässle! Am Gämsbärg no aimool Basler Marsch und dr Fasnachtszauber isch verbi. Schaad, aber scheen ischs gsi!

E härzliggs Danggscheen für alli die wo viel gschaftt hän.

Das wär sie gsi, mini erschdi Fasnacht bi de Alte vo de Rolli. Und ich freu mi scho jetzt, wenns am 18. Hornig 2013 heisst: ACHTIG, MORGESTRAICH, VORWÄRTS MARSCH!

Claudia

FASNACHTSBUMMEL 2012 IN BASEL VO DR ALTE GARDE

Dr dritti Bummelsunntig mues jo nyt immer dr „scheenschti“ si het sich dr Petrus gsait und`s au no e weneli Rägne loh.

Am Morge im Spärber zem Kaffi, Gipfeli, Bier und Jägermaischter isch d`Wätterwält no in Ordniig gsi.

So sin mir nach de elfi z`Fuess ins Naturhistorische Museum an d Auguschtinergass gloffe und hänn in zwei Gruppe e interessant Fiehrig durch d`Knoche Usstellig derfe gniesse. Ganz no em Sujet isch es interessant gsi was me alles vo „alte Knoche“ ka erfahre (s het nyt mit dr alte Garde z`tue). ☺

Kommend vom Hotel Basel sin mir dert ahne wieder zrug in Basler Käller go gnisslig Ässe.

Drey e halb Stund hänn mir uns verwöhne loh mit em e usgezeichnete Schwyynsfiletässe und natirlich au mit sehr guetem Wyy.

Mit viel Vorschusslorbeere isch dr Alti Garde Schnitzelbangg empfangen worde.

Si sin in kainem Fäärs ebbis schuldig bliebe. Die ganzi Clique het sich während allne Fäärs usgezeichnet amüsiert und zum Dail sogar d`Büch ghebbt vor Lache.

Pinggtlig am vieri sin mir den richtig Daagesliecht gange und....es het gschittet wie us Kieble.





Alli Plastik montiert sin mir, im Wätter trotzend, abmarschiert und mit „Rollischer“ Musik quer durch d’Stadt gloffe.

Am viertel vor säxi hänn mir den die Junge ufgaabet und sin vom Stadtkäller zem Brune Mutz gloffe. Es het aifach nur guet döhnt. ☺

Nachdäm die Jungi richtig Freie Strooss gloffe sin hänn mir dr Wäg igschlaage natirlichzem Hotel Basel.

Derte hetts fir Alli no ebbis zem Bigge und Sirpfle gäh bevor’s langsam richtig Ändstraich gange isch. Exaggt am zähni z’Nacht hän mir mit em e fätzige Basler Marsch unseri Fasnacht 2012 beändet.

Schilbi

Ich glaube doch mit Recht sagen zu dürfen, dass die Fasnacht 2012 niemanden kalt gelassen hat. Und ich glaube wir dürfen alle stolz sein, dass es uns als Alter Garde gelingt, innerhalb eines Jahres einen Marsch wie den Monty auf die Strasse zu bringen (inklusive ein paar Wacklern zwischen durch; was solls!!).

In diesem Sinne bis zum nächsten Mal.

Uffleesig Rolli Tescht 2012-2

el galés
la cornamusa
el festival
la vieja
sesenta nueve
el payaso
Joan Vapor
los Británicos

dr Waliser
dr Dudelsagg
Festival oder Festspiel
die Alte
69
dr Bajass
Hansdampf
d Brite

el bufón
el lancero
la ruta
el tocador / la tocadora de flauta
el tambur / la tambura

dr Hofnarr
dr Lancier
d Route
Pfeifer/-in
Tambour/-öse



Uffleesig Rolli Quiz

HELGE

E Velotürli für Fortgschritteny

Ussflugs - Tipp



Grällige - Eigehof - Himmelried - Zullwil - Nunnige - Neuhüsli - Oberbeinwil - Beinwil - Unterbeinwil - Erschwil - Büsserach - Breitenbach - Brislach - Zwinge - Grällige

Raini Fahrtzyt 4,5 Std. Het e paar Höhemeter zum bewältige, landschaftlig aber wunderbar.

Ob me mit em Zug noch Grällige goht, oder scho mit em Velo, isch jedem sälber überloh. Vo Grällige fahrt me Richtig Seewe d'Strooss duruff, nocheme rächte Stügg nimmt me d'Abzwygyg zum Eigehof (kame scho s'erschte Mool e "Boxestopp" mache) Denn gohts wyter Richtig Himmelried, Zullwil und Nunnige. D'Ruine Gilgebärg stoht rächts v o dr Stroos markant in dr Gägend.

Gly noch em Ortschild Nunnige nimmt me d'Abzwiigig rächts uff, do dien si aim nätterwys druff ufmerksam mache, mit wie viel Höhemeter me sich uff de nägschte Kilometer duet usenandersetze (für Profis notürlich e Klags ☺)

Noch däm schweisstrybende Uffstig kunnt me zum Nunnigerbärg (do irre mängmole paar Rolli-Fraue umme ☺) und ka e Päuseli ylege und d'Gägend gniesse. Aschliessend fahrt me via Neuhüsli (wär Ambitione het ka vo do uss au no über dr Passwang, s'isch nümme so wyt), Beinwil, Brislach, Zwinge widder noch Grällige. Die wo nümme möge könne s'Velo in Zug ylade, die andere nämme dr Velowäg Richtig Duggige-Aesch und widder Heim.

